

合江縣志

壹集

志序

跋

凡例

目錄

職名

宸翰

同治十年增脩

合江縣志

學署藏板

縣志舊序

葉體仁

余蒞斯土已七年矣五夜兢兢愧無善狀可以上報
朝廷下撫士庶雖或城郭輿圖廟壇宮院漸次培脩要皆
分所應耳又嘗念朱紫陽詢郡志於南康而論者咸以
爲知務因是知志之不可不脩也合邑向無舊志且地
居僻壤樸略成俗詢其文獻俱無可徵乃與邑之紳士
共相採訪始成是帙夫前之不興是舉者殆亦以事蹟
之茫無可據而憚其難耳不知是書有關國是有利民
風司牧者不任其難待化者又誰寬其咎今縱無舊志

合江縣志

卷首

一

可考而或於省志核其大概或於州治溯其源委又或
於殘碑斷碣識其忠臣義士雖明知不無遺漏然較昔
毫無所傳則有閒也昔劉知幾論史有三長袁崧論史
有五難志固無殊於史作者亦正不易惟於輿圖沿革
詳其文官職祀典昭其實忠孝廉節表其名俾後之人
信以傳信疑以存疑亦可寓勸善懲惡之意焉是舉也
閱數月而始竣其丹鉛論定皆吾師墨園夫子主之余
不佞相與聿觀厥成而尤願邑之人藉爲觀摩作忠作
孝以不負余今日創志之苦心則大幸矣梓成於是

書乎

縣志舊序

乾隆二十七年

瀘州知州 護
甯州道

夏詔新

雲南姚州

從來事之出於因者則易出於創者則難非難也
難之欲得其真耳然不有其難何知其易易固俟
其所創而難卽爲因之始基也如我合江令葉君
西田壬申歲奉

命簡發河南卽攝篆汝甯通判及羅山正陽遂平汝陽
等縣印務旋卽授知孟津縣事將欲調補祥符祇
緣

令兄方伯公由浙江調任河南而葉君遵例迴避

合江縣志

卷首

序

二

遂復蒙

聖恩補授合江夫合江非巨邑也雖地勢濱江而其間
城郭之傾圮壇廟之頽壞道路之殘缺橋梁之坍塌
與夫書院學宮之毀陋人情風俗之遷移數十年來
竟無一補其缺開其新振其靡清其弊者而葉君抵任
後卽矢心竭力勞瘁寒暄上爲

聖天子勤報最下爲凡百姓任艱辛七載之內舉所謂
城郭壇廟道路橋梁書院學宮以及人情風俗何
一不爲之補缺開新振靡清弊巍巍乎如江河布

地日月麗天也哉然猶幸其出於因而非出於創耳乃葉君復以邑志持商於余余非不歡然色喜但邑之有志猶國之有史史固所以傳信志亦所以存真且合邑更非他邑可比山偏水僻歷考並無成書而葉君獨任其難創始圖新特集闔邑紳士面諭或任分纂或任分校或任採擇約計若干條余覽其書判若兩儀奠定分如四象燦陳明似八卦昭列所未見者得覩其實所未聞者得悉其真歷閱數過未嘗不嘆良工之心苦又未嘗不喜

賢吏之才優邑之士庶能勿樂其志之新創而因之得其始基也哉是爲序

縣志舊敘

乾隆二十七年

石阡府知府

羅文思

邑人

合江符陽古邑也山河流峙竹樹紛披風土醅良
人民輻輳自秦漢以迄唐宋未嘗不稱甚盛焉迨
經兵燹之後傾圮廢墜之態目幾不忍覩矣莅茲
土者其必有所以振靡救敝而爲一邑之保障也
則幸甚丙子歲 邑侯葉公奉

命來合越數載約已惠民政修人理百廢俱舉外復蒐
合邑故乘以昔年之行事爲今日之官箴詎知遠
稽近考而所謂編年紀月者渺不可得因喟然歎

合江縣志

卷首

序

四

曰邑之不可無志猶國之不可無史也國無史無
以表一國之事蹟邑無志亦無以彰一邑之楷模
此咎舍司牧其奚歸遂決計纂修並延 貴業師
朱墨園先生總理其務公饒史才墨圍先生亦熟
於記載獨愧余以一官匏繫西秦未得與我 邑
侯時親教益且爲我 邑侯共襄盛舉也中間王
事奔馳關河迢遞雖魚雁時通要亦徒藉雲樹纏
繞我邑侯左右間耳今值志工告竣邑侯捐差抵
秦屬序於余且將志稿寄讀余恭覽數過但見綱

目臚分經紀整秩體制倣諸大家論贊綽有深意
人之有關地方者無微弗及事之有關世道者無
隱弗彰搜奇摘遠以示公忠藏慝標媿以存厚道
古稱班馬之才不是過也余因不揣固陋特僭數
言以應 邑侯之命

續脩縣志序

竊惟府州縣之有志猶國之有史也品崇孝弟俗尙敦
龐凡庠序學校士習民風以及休祲災祥無不悉備亦
無不悉舉合江雖彈丸小邑而上接瀘敘下達重夔固
人物輻輳風俗充美之區也不特士人讀書舉業秩秩
雍雍恪遵禮法卽僻壤鄉愚尙知廉恥閒有無知之輩
藉端生釁以致自罹法網而一經訓飭莫不俯首服從
故雖白蓮等教於地方滋擾卽次蹂躪邑中無脅從鼠
合江縣志

卷首

六

竄之人可見民風淳厚尙非澆漓積習者可比也余自
丁卯冬來涖茲土凡邑之政令無事更張亦無敢懈怠
上以體

聖天子牧民之至意下以慰士庶人屬望之深心因思合江
縣志於乾隆壬午歲創脩後迄今幾五十年鼠殘蠹蝕
剝落不堪壬申春閒奉文纘輯卽與廣文楊致道鄭國
楹共議圖修一時紳士周治鄭廷臣闕明久胡樑等各
自解囊並首倡募捐共勦厥事俱欣然樂從一切藝文
事實依次增補及抄謄校對付梓鐫刻各派司事者爲

之治理至五月告成亦兩學博及紳士之力居多凡邑
中事蹟縱不能無遺漏除無考不能追述外靡不備載
於篇中未始非型方訓俗之一助云是爲序
嘉慶十七年壬申知合江縣事秦湘撰

續脩縣志序

合江在漢爲符縣東漢曰符節肅齊曰安樂至後周始改爲合江蓋取雙江匯合而名之也邑乘自前令江夏葉公體仁采輯後續脩無聞遂使數十年中可信而可傳者皆曠闕弗載良可歎也我蘭畹明府蒞任五載道齊化洽百廢俱興日者屬余同事二人告之曰邑之有志猶國之有史隨時補葺正不可廢兩君曷共圖之余惟此舉風教所關苟非確有依據而欲妄肆摭拾則信者未信疑者益疑於勸懲之義奚取焉乃退而搜集舊

合江縣志

卷首

序

八

志並與學中諸同人參互考訂以求其實去取予奪無敢稍濫至逐卷次第悉照大憲發給式樣依類編成其有不關邑事如帝王故宮僭竊之類亦略敘數語用存其日期完備也晦朔五易未敢告勞矢慎矢勤乃成是集較諸從前所作或者其有當乎抑聞邑前輩王蜀元董樗齋兩先生俱有舊稿徧求之竟不可得是又不無遺憾云

合江訓導鄭國楹撰

續脩邑志序

志者古史之流別淑慝昭懲勸人心風俗所關匪淺也

合江向無志乘乾隆二十七年前任葉公體仁始創修之其時期在速成故考核未詳採訪未徧遺漏實多然猶賴有是編不至古蹟消磨文獻無徵則皆葉公之力也余司鐸於茲已經六載居嘗與都人士以詩文相切磋復諄諄以砥行立名爲諭期於不失其職閒或談論風土人物得一可信可傳者卽筆而存之而二三好古之士亦往往以素所聞見相質謂其不獲續入志中爲恨蓋自壬午之後迄今又五十年其間循良之吏俊傑之生與夫忠孝節烈爲一時所稱頌者多矣我明府秦

合江縣志

卷首

序

九

蘭畹先生以江左名家惠蒞斯邑下車之後興墜舉廢區畫咸周自捐廉改建書院文橋各祠宇而外時亦念及縣志久殘欲重脩之未果會大憲議增省志並檄各府廳州縣重加補輯以備采取乃屬余同事二人刻期謀始兼以邑中紳士數人共相較論爬羅剔抉頗著微勞片語單詞俱昭慎重是役也閱五月而告成逐類分載較昔自加詳焉然其心猶是葉公之心也况邑稱名勝向爲人文薈萃之區吾知少岷毓秀賢哲彙生事業勳名必有聯而未艾者尤願後之人維持風化相與陸

續脩明庶幾表微闡幽垂爲矩範俾觸目者務本敦倫
咸知取法未始非化民成俗之一道也昔常道將志蜀
人物自漢及晉四百人復撰後賢志益其未備呂大防
以樂道人善稱之區區之心是所望於後之官是邑與
居是邑者

教諭楊致道撰

合江縣志

卷首

序

十

增修縣志跋

邑乘以行遠也顧穢史謗書昔人不免下此則何能爲
役然動諉於志具才識之不逮使數十年忠孝節義卓
卓然可資激勸者煙銷雨散滅沒而不彰則大不可况
邑志續修於嘉慶十七年迄今垂六十載矣壬戌秋髮
賊過境兵燹後文獻無徵兼以原板散佚無存是又宜
踵而修焉非必作述才之謂其謂因陋就簡傳其人不
計其文之工拙以表暴於當世雖不敏其又奚辭夫志
之敝也以愛憎爲取舍以恩怨爲褒貶以親疎異同爲

合江縣志

卷首

跋

十一

抑揚而進退幸不然而域於耳目窘於諮詢獲者什一
而遺之者倍蓰甚或鋪張鴻藻馳騁其議論以夸多而
鬥靡雖規摹古作者之林於體制亦非宜今新增者什
之二三經各大令纂輯成編餘皆因仍舊製庶可告無
罪於當時見原於公論若夫言之無文行而不遠心誠
慝焉請以俟後之君子

同治十年仲夏月

邑人羅增垣謹跋

合江縣志

凡例

一邑志創修於乾隆二十七年知縣葉體仁分類成編計共八卷列目二十有六今遵

上憲發給式樣續修共五十四卷

一舊志用龍門式每類各冠一序聲明作某某序雷同勦說多未盡工今照康對山武功志一概刪去以明不敢上同於省志之意也

一我

合江縣志

卷首

凡例

十二

朝併丁歸地以康熙五十年爲例永不加賦嗣後恩詔頻頒疊免應徵錢糧實爲曠古所未有至於尊崇聖學凡丁祭儀文度數更極周詳自當敬謹備載俾士民觸目奮勉知所圖報

一志以示勸膺斯土者稱職固難卽生長其間而一行有虧亦難免於物議茲依舊志查職官選舉中有實在可傳者分載政績人物中以爲後來者法至於現存之人雖多品行卓卓未敢遽作諛詞亦蓋棺論定之意也

一山川寺廟舊志所載甚少此次詳加採訪逐一載明至於溪水塘堰尤關農事亦並清查載入一藝文所收取其有關邑事亦必其人之德望可以言傳然後間存一二以志其名非爲傳稿計也故此次列入甚少至舊志所存未便盡去仍之

一舊志錯誤甚多如鄉賢必經詳報奉

旨准入方可載明舊志於人物中一概盡作鄉賢此一誤也選舉必須分載各途舊志於進士中列入

合江縣志

卷首

凡例

十三

貢生數人所中科分先後亦皆錯亂此二誤也山川古蹟有再見三見者核其里數多寡俱未畫一此三誤也之溪安樂溪本一水而分爲二大涉鰲部本二水而混爲一又引古書半多穿鑿附會甚有謂安樂溪水西北流入納谿縣更屬不合此四誤也明知縣龔卿已列職官於文橋下又著爲邑人此五誤也今皆逐一更正一修志與修史同當筆則筆當削則削原不可任意偏私致違公論此次續修較昔頗加詳慎至

於編輯論定則學博楊君致道鄭君國楹之力
爲多採訪則邑廩生黃太和鄒輝榮羅廷翼增
生陳舉校刊則州同周治監生鄭廷臣闕明久
胡樑皆與有勞也例得備書

合江縣志卷首

目錄

卷首

序文

跋

職名

凡例

宸翰

合江縣志

卷首

十五

合江縣志卷首

目錄

卷一

星野

卷二

圖考

卷三

建置沿革

卷四

合江縣志

卷首

目錄

十六

疆域

卷五

形勢

卷六

山川

附

鏡清樓圖記

卷七

戶口

卷八

田賦

附

積貯

歲支

濟倉

三費局

卷九

水利

卷十

城池

卷十一

關隘
附

場市

卷十二

津梁
附

救生船

卷十三

合江縣志

卷首

目錄

十七

古蹟
附

廢蹟

坊表

卷十四

公署

卷十五

學校
附

義學

卷十六

祀典

卷十七

祠廟

卷十八

風俗 附 鄉飲

卷十九

兵制

卷二十

屯田

卷二十一

邊防

卷二十二

合江縣志

卷首

目錄

十八

驛傳

卷二十三

舖遞

卷二十四

土司

卷二十五

武功

卷二十六

屯練

卷二十七

寺觀

卷二十八

鹽法

卷二十九

茶法

卷三十

錢法

卷三十一

合江縣志

卷首

目錄

十九

木政

卷三十二

權政

卷三十三

蠲政

卷三十四

職官

卷三十五

選舉

附

武科

成均

援例

卷三十六

封蔭

卷三十七

政績

卷三十八

人物

名臣 孝友

宦業 附耆壽

儒林 義夫

文苑

處士

忠義

卷三十九

列女

節孝

節烈

貞女

卷四十

合江縣志

卷首

目錄

二十

隱逸

卷四十一

流寓

卷四十二

仙釋

卷四十三

方技

卷四十四

古帝王

卷四十五

故宫

卷四十六

陵墓

卷四十七

僭竊

卷四十八

藝文

墓誌銘

傳

墓表記

序狀

疏

壽

序跋

詩啟

引

卷四十九

合江縣志

卷首

目錄

廿一

典籍

卷五十

金石

卷五十一

物產

卷五十二

祥異

附

己未壬戌日記

卷五十三

雜識

卷五十四

外紀

合江縣志

卷首

目錄

廿二

合江縣卷首

職名

總裁 乾隆二十五年創修

特授瀘州直隸州合江縣加五級紀錄十次葉體仁 江夏舉人

總裁 嘉慶十七年續修

特授瀘州直隸州合江縣加五級紀錄十次秦 湘 金櫃舉人

總裁 同治十年增修

欽加運同銜奏署瀘州直隸州合江縣事屏山縣正堂隨帶加二級覃恩加一級紀錄十次瞿樹蔭 武進貢生

署理四川瀘州直隸州合江縣正堂即補軍糧府加五級紀錄茨李宗疇 南海監生

合江縣志

卷首

職名

廿三

欽加同知銜特授四川瀘州直隸州合江縣正堂加五級紀錄十次慶 煜 鑲藍旗滿洲筆帖式

監理

瀘州直隸州合江縣儒學教諭沈雲裳 新甯廩貢

瀘州直隸州合江縣儒學訓導劉錫疇 德陽舉人

督刊

瀘州直隸州合江縣典史 陸承繩孫若

纂修

同知銜候選知縣 羅增垣 邑人

丁卯科舉人揀選知縣 莫欽濤 邑人

恩貢生候選教諭黃寬文海邑門人

候選儒學訓導許治安立邑三人

校對

己未科舉人揀選知縣何作霖子邑笠人

己未科舉人揀選知縣許寶笙廩邑堂人

甲子科舉人揀選知縣劉文驤仿邑皋人

儒學員戴映奎蓮邑溪人

儒學員鄭卿誠邑齋人

儒學員黃垂繼邑可人

合江縣志 卷首 職名 二四

儒學員李超瓊紫邑璈人

採訪

候選教諭張思陞邑人

候選訓導甘雨和邑人

儒學員蔡先知邑人

儒學員左迪恂邑人

儒學員劉堃邑人

儒學員許紹堂邑人

儒學員江聲揚邑人

儒學生員張萃義邑人

儒學生員李盛芬邑人

儒學生員李超元邑人

儒學生員張熙烈邑人

儒學生員李錫林邑人

儒學生員王洪祚邑人

儒學生員王鍾義邑人

儒學生員李文銘邑人

膳錄生袁本欽邑人

合江縣志
卷首
職名
廿五

膳錄生莫欽濂邑人

膳錄生黃如松邑人

繪圖從九王元釗邑人

局士監生邱明福邑人

合江縣志卷首

藝文志

宸翰

康熙四十一年

御製訓飭士子文

國家建立學校原以興行教化作育人材典至渥也朕臨御以來隆重師儒加意庠序近復慎簡學使釐剔弊端務期風教修明賢才蔚起庶幾棫樸作人之意乃比年士習未端儒效罕著雖因內外臣工奉行未能盡善

合江縣志

卷首

藝文

宸翰

二六

亦由爾諸生積錮已久猝難改易之故也茲特親製訓言再加警飭爾諸生其敬聽之從來學者先立品行次及文學長列宮牆朝夕誦讀甯無究心必也躬修實踐砥礪廉隅敦孝順以事親秉忠貞以立志窮經考業勿雜荒誕之談取友親師悉化驕盈之氣文章歸於醇雅毋事浮華軌度式於規繩最防蕩軼子衿佻達自昔所譏苟行止有虧雖讀書何益若夫宅心弗淑行己多愆或蜚語流言挾制官長或隱糧包訟出入公門或唆撥奸猾欺孤凌寡或招呼朋類結社要盟乃如之人名教

不容鄉黨勿齒縱幸脫褫撲濫竊章縫返之於衷甯無愧乎况夫鄉會科名乃掄才大典關係尤鉅士子果有眞才實學何患困不逢年顧乃標榜虛名暗通聲氣夤緣詭遇罔顧身家又或改竄鄉貫希圖進取囂陵騰沸網利營私種種弊端深可痛恨且夫士子出身之始尤貴以正若茲厥初拜獻便已作奸犯科則異時敗檢踰閑何所不至又安望其秉公持正爲國家宣猷樹績膺後先疏附之選哉朕用嘉惠爾等故不禁反覆惓惓頒茲訓言爾等務共體朕心恪遵明訓一切痛加改省爭

合江縣志

卷首

藝文

宸翰

二七

自濯磨積行勤學以圖上進國家三年登造束帛弓旌不特爾身有榮卽爾祖父亦增光寵矣逢時得志甯俟他求哉若仍視爲具文玩愒勿傲毀方躍冶暴棄自甘則是爾等冥頑無知終不能率教也旣負栽培復干咎戾王章具在朕亦不能爲爾等寬矣自茲以往內而國學外而直省鄉校凡學臣師長皆有司鐸之責者並宜傳集諸生多方董勸以副朕懷否則職業勿修咎亦難逭勿謂朕言之不早也爾多士尙敬聽之

雍正三年

御製朋黨論

朕惟天尊地卑而君臣之分定爲人臣者義當惟知有君惟知有君則其情固結不可解而能與君同好惡夫是之謂一德一心而上下交乃有心懷二三不能與君同好惡以至於上下之情睽而尊卑之分逆則皆朋黨之習爲之害也夫人君之好惡惟求其至公而已矣凡用舍進退孰不以其爲賢而進之以其爲不賢而退之惟或恐其所見之未盡當也故虛其心以博稽眾論然必眾論盡歸於至正而人君從之方合於大公若朋黨合江縣志

卷首

藝文

宸翰

二八

之挾偏私以惑主聽而人君或誤用之則是以至公之心反成其爲至私之事矣孟子論國君之進賢退不肖既合左右諸大夫國人之論而必加察焉以親見其賢否之實洪範稽疑以謀及乃心者求卿士庶民之從而皇極敷言必戒其好惡偏黨以歸於王道之蕩平正直若是乎人君之不自用而欲盡化天下之偏私以成大同也人臣乃敢溺私心樹朋黨各徇其好惡以爲是非至使人君懲偏聽之生奸謂反不如獨見之公也朋黨之罪可人□乎我

聖祖仁皇帝御極六十年用人行政邁越千古帝王而大小臣僚未能盡矢公忠往往要朋結黨

聖祖戒飭再三未能盡改朕卽位以來屢加申飭而此風尙存彼不顧好惡之公而徇其私暱牢不可破上用一人則相與議之曰是某所汲引者也於是乎遠之若浼曰吾避嫌也不附勢也爭懷妒心交騰謗口以媒蘖之必欲去之而後快上去一人則相與議之曰是某所中傷者也親暱者爲之惋惜疏遠者亦慰藉稱屈卽素有嫌隙者至此反致其殷勤欲借以釋恨而修好求一人

合江縣志

卷首

藝文

宸翰

二九

責其改過自新者無有也於是乎其人亦不復自知其過惡而愈以滋其怨上之心是朝廷之賞罰黜陟不足爲輕重而轉以黨人之咨嗟歎息爲榮以黨人之指摘詆訾爲辱亂天下之公是公非作好惡以陰撓人主予奪之權朋黨之爲害一至此哉且使人主之好惡而果有未公則何不面折廷爭而爲是陽奉陰違以遂其植黨營私之計也書曰予違汝弼汝無面從退有後言當時君臣告語望其匡弼而以面從後言爲戒夫是故一堂之上都兪吁咈用能賡歌拜颺以成太和之運朕無

日不延見羣臣造膝陳詞何事不可盡達顧乃默無獻替而狡獪叵測蓄私見以肆爲後言事君之義當如是乎古純臣之事君也必期致吾君於堯舜而人君亦當以堯舜自待其身豈惟當以堯舜待其身亦當以皋夔稷契待其臣孟子曰責難於君謂之恭陳善閉邪謂之敬吾君不能謂之賊夫以吾君不能而謂之賊則爲君者以吾臣不能亦當謂之忍語云取法乎上僅得乎中苟不以唐虞君臣相期待而區區效法僅在漢唐以下是烏能廓然盡去其私心而悉合乎大公至正之則哉

宋歐陽修朋黨論創爲異說曰君子以同道爲朋夫罔上行私安得爲道修之所謂道亦小人之道耳自有此論而小人之爲朋者皆得假同道之名以濟其同利之實朕以爲君子無朋惟小人則有之且如修之論將使終其黨者則爲君子解散而不終於黨者反爲小人乎設修在今日而爲此論朕必飭之以正其惑大抵文人掉弄筆舌但求騁其才辯每至害理傷道而不恤惟六經語孟及宋五子傳註可奉爲典要論語謂君子不黨在易渙之六四曰渙其羣元吉朱子謂上承九五下無

應與爲能散其朋黨之象大善而吉然則君子之必無朋黨而朋黨之必貴解散以求元吉聖人之垂訓亦既明且切矣夫朋友亦五倫之一朋黨不可有而朋友之道不可無然惟草茅伏處之時恆資其講習以相攸助今旣登朝涖官則君臣爲公義而朋友爲私情人情當以公滅私豈得稍顧私情而違公義且卽以君親之並重而出身事主則以其身致之於君而尙不能爲父母有況可藉口於朋以怙其黨乎朕自四十五年來一切情僞無不洞矚今臨御之後思移風易俗躋斯世於熙

合江縣志

卷首

藝文

宸翰

卅一

人君不當親庶務者信若斯言則皋陶之陳謨何以云一日二日萬幾孔子之贊舜何以云好問好察此皆朋黨之錮習未去畏人君之英察而欲蒙蔽耳目以自便其好惡之私焉耳朕在藩邸時坦易光明不樹私恩小惠與滿漢臣工素無交與有欲往來門下者嚴加拒絕聖祖見朕居心行事公正無私故令纘承大統今之好爲朋黨者不過冀其攀援扶植緩急可恃而不知其無益

也徒自逆天悖義以陷於誅絕之罪亦甚可憫矣朕願滿漢文武大小諸臣合爲一心共竭忠悃與君同其好惡之公恪遵大易論語之明訓而盡去其朋比黨援之積習庶肅然有以懍尊卑之分歡然有以洽上下之情虞廷賡歌颺拜明良喜起之休風豈不再見於今日哉

乾隆五年

欽頒太學訓飭士子文

士爲四民之首而太學者教化所先四方於是觀型焉比者聚生徒而教育之董以師儒舉古人之成法規條

合江縣志

卷首

藝文

宸翰

卅二

亦旣詳備矣獨是科名聲利之習深入人心積重難返士子所爲汲汲皇皇者惟是之求而未嘗有志於聖賢之道不知國家以經義取士使多士由聖賢之言體聖賢之心正欲使之爲聖賢之徒而豈沾沾焉文藝之末哉朱子同安縣諭學者云學以爲己今之世父所以詔其子兄所以勉其弟師所以教其弟子弟子之所以學舍科舉之業則無爲也使古人之學止於如此則凡可以得志於科舉斯已爾所以孜孜焉愛日不倦以至於死而後已者果何爲而然哉今之士惟不知此以爲苟

足以應有司之求矣則無事於汲汲爲也是以至於惰遊而不知反終身不能有志於學而君子以爲非士之罪也使教素明於上而學素講於下則士子固將有以用其力而豈有不勉之患哉諸君苟能致思於科舉之外而知古人之所以爲學則將有欲罷不能者矣觀朱子此言洵古今通患夫爲己二字乃入聖之門知爲己則所讀之書一一有益於身心而日用事物之間存養省察闡然自修世俗之紛華靡麗無足動念何患詞章聲譽之能奪志哉况卽爲科舉亦無碍於聖賢之學朱

子云非是科舉彘人人彘科舉若高見遠識之士讀聖賢之書據吾所見爲文以應之得失置之度外雖日日應舉亦不彘也居今之世雖孔子復生也不免應舉然豈能彘孔子也朱子此言卽是科舉中爲己之學誠能爲己則四書五經皆聖賢之精蘊體而行之爲聖賢而有餘不能爲己則雖舉經義治事而督課之亦糟粕陳言無裨實用浮僞與時文等耳故學者莫先於辨志志於爲己者聖賢之徒也志於科名者世俗之陋也國家養育人材將用以致君澤民治國平天下而囿於積習

不能奮然求至於聖賢豈不謬哉朕膺君師之任有厚望於諸生適讀朱子書見其言切中士習流弊故親切爲諸生言之俾司教者知所以教而學者知所以學